

Semangat Korban Aidiladha di UMS

Kedatangan Aidiladha atau Hari Raya Korban merupakan antara detik yang ditunggu-tunggu oleh seluruh umat Islam sedunia. Universiti Malaysia Sabah (UMS) tidak ketinggalan menyambut perayaan tersebut dengan semangat pengorbanan yang ditunjukkan oleh warga UMS pada 23 Januari yang lalu. Ini terbukti dengan tumbangnya lapan ekor lembu hasil penyertaan beberapa warga UMS termasuk Naib Canselor pertama, Tan Sri Prof. Datuk Seri Panglima Dr. Abu Hassan Othman dan Pegawai-pegawai Kanan UMS. Selain menyahut seruan syiar Islam yang dibawa oleh Nabi Ibrahim, budaya bantu-membantu yang ditunjukkan dalam majlis sambutan tersebut sebenarnya merupakan pemangkin ke arah perpaduan yang lebih erat di kalangan warga UMS.

Sementara itu, sempena sambutan Maal Hijrah 1426 pada 1 Muharam yang lalu, majlis bacaan Yasin, tahlil dan doa kesyukuran diadakan pada 9 Februari 2005 di Masjid UMS. Lebih 300 pelajar UMS dan beberapa jemaah masjid yang tinggal berdekatan dengan kampus induk UMS telah hadir dalam majlis tersebut.

Dalam pada itu, Jabatan Kemajuan Islam Malaysia (JAKIM), Cawangan Sabah dan UMS telah menganjurkan Ceramah Perdana Keindahan Islam sempena Maal Hijrah 1426 di Dewan Kuliah Perdana pada 10 Februari yang lalu. Hijrah sebenarnya bukan sekadar perpindahan dari satu tempat ke satu tempat yang lain tetapi lebih daripada itu, hijrah mengajak kita supaya lebih prihatin kepada perubahan minda yang lebih positif.

Begitulah antara petikan ceramah yang telah disampaikan oleh Prof. Dr. Mohd Yusof Othman, Pengarah Pusat Pengurusan Penyelidikan, Universiti Kebangsaan Malaysia.

Exco Kerohanian Jakmas Kurnia Perdana dengan kerjasama Unit Hal Ehwal Islam dan Masjid juga telah menganjurkan Bengkel Imam, Bilal dan Khatib bertempat di Masjid UMS pada 19 Februari yang lalu. Di antara objektifnya ialah melahirkan mahasiswa yang mampu menguasai bidang agama selain akademik.